

# Naalakkersuisunut suliat akimorlugit suleqatigiiffik pillugu Kaajallaasitaq

Naalakkersuisut suleriaasiat pillugu Namminersorlutik Oqartussat nalunaarutaanni nr. 28, 13. juli 2022-meersumi § 1, imm. 4 naapertorlugu aalajangersarneqarpoq:

## *Naalakkersuisut atuunneranni suliat akimorlugit aaqqissuussineq*

**§ 1.** Naalakkersuisunut suliat akimorlugit suleqatigiiffimmik pilersitsisoqassaaq, siunertarineqarluni eqaatsumik matoqqasumillu oqallissinnaanissaaq, aaqqissuussisinnaanissaaq kiisalu Naalakkersuisunut pingaaruteqarluinnartut politikikkut apeqqutit pillugit aalajangiinerit ingerlanneqartarnissaat.

*Imm. 2.* Suliat akimorlugit suleqatigiiffik Naalakkersuisut siulittaasuannit imaluunniit Naalakkersuisunit suliaassanngortinneqarsimasut pillugit aalajangiisinnaassuseqarput.

*Imm. 3.* Suliat akimorlugit suleqatigiiffimmi eqaatsumik ilisimasanik avitseqatigiittarneq, politikikkut taasisarnerit aamma suliat akimorlugit malittarisassanik naleqqersuisarnermi tapersersoqatigiittoqassaaq.

**§ 2.** Suliat akimorlugit suleqatigiiffimmi ilaasortat aalajangersimasut tassaapput:

- 1) Naalakkersuisut Siulittaasuat
- 2) Naalakkersuisut siulittaasuata tullia
- 3) Aningaasaqarnermut Naalakkersuisoq

*Imm. 2.* Naalakkersuisuni ilaasortat allat, imaluunniit Naalakkersuisoqarfinni pisortat imaluunniit taakkua sinniisussaata sammisassanut attuumassuteqartunut oqallinnermi taasisinnaanatik peqataasinnaapput.

*Imm. 3.* Naalakkersuisuni siulittaasup tullia Aningaasaqarnermut Naalakkersuisuutillugu siulittaasoq allamik toqqaasinnaavoq.

**§ 3.** Naalakkersuisut Siulittaasuat suleqatigiiffimmi siulittaasuvoq.

*Imm. 2.* Siulittaasoq ataani allassimasut pillugit aalajangiisinnaavoq:

- 1) Ataatsimiititsinerit.
- 2) Ataatsimiinnermi peqataasussat.
- 3) Immikkoortut oqaluuserineqartussat aamma suliat killissaat.

*Ataatsimiittarnerit*

**§ 4.** Ataatsimiinnissamut siulittaasoq pisariaqartitsineq naapertorlugu aamma pisariaqartitsinermi piffissaq sivikitsoq atorlugu aggersaasassaaq.

*Imm. 2.* Aalajangiinerit sapinngisamik isumaqatigiinnikkut pisassapput. Aalajangiiffissatut siunnersuut amerlanerussuteqartunik akuerineqartinnani atorunnaassaaq.

**§ 5.** Ataatsimiinnerit oqaluuserisassartaqarani ingerlanneqarsinnaapput.

*Imm. 2.* Ataatsimiinnerit suliat sakkortussusaannut naapertuuttumik kiisalu siulittaasup aalajangiinera tunngavigalugu eqaatsumik aaqqissuunneqassapput.

**§ 6.** Naalakkersuisut siulittaasoqarfianit allatseqarneq ingerlanneqassaaq, tamatumunnga ilanngullugit:

- 1) Ataatsimiigiaqqussutit nassiussuunneri,
- 2) Ataatsimiinnerit timitalerneqarnerisa ingerlanneqarneri aamma
- 3) Aalajangiussatut imaqarniliamut missingiummik suliaqarneq, takuuk § 7, imm. 1.

**§ 7.** Ataatsimiinnerit ingerlaneri imaqarniliamut missingiusiorneqassapput.

*Imm. 2.* Inaarutaasumik politikikkut isumaqatigiissutit imaqarniliami takuneqarsinnaassapput.

*Atuutilersitsineq*

**§ 8.** Kaajallaasitaq manna ulloq 15. august 2026 atuutilerpoq

*Imm. 2.* Peqatigisaanik ataqatigiissaarinermut ataatsimiititaliaq aamma ataqatigiissaarinermut immikkoortortat pillugit kaajallaasitaq nr. 35, 15. april 2025-meersoq-meersoq atorunnaarsinneqarpoq.

*Naalakkersuisut Siulittaasuata Naalakkersuisoqarfa, ulloq 15. august 2026*

**Jens-Frederik Nielsen (atsior.)**

Naalakkersuisut Siulittaasuat

/ Hans-Peder Barlach Christensen (atsior.)

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut